

少師朱襄毅公督蜀疏草

少師朱襄毅公督蜀疏草卷之上

直明郎撫悞報遵義情形疏

欽差總督四川兼制湖廣荆岳鄖襄四府陝西漢中一  
府軍務策應緩急督理糧餉兼巡撫四川等處地方兵  
部尚書兼都察院右都御史臣朱燮元謹題爲直叙遵  
義情形以明不欺事臣於本年正月內接邸報見鄖陽  
撫臣畢懋康一本爲藺賊餘焰復張荆楚近患日棘謹  
據邊報情形直述飛報并申前疏設將增兵之請以禦

欽奉以保危疆事奉聖旨奢酋糾黨被城勢復猖獗設  
將增兵及附近調官等項作速議覆以資防禦該部知  
道欽此臣未見全抄不知所指何地所憑何文撫臣亦  
未移會及二月二十四日始得邸報抄錄蓋荆南道僉  
事喬拱璧申文據荆瞿守備潘承嗣所稟報者隨於次  
日卽接撫臣畢懋康會稿爲續報蜀中聲息以紓聖懷  
請固荆南保障以安重地事全疏移會到臣其前後互  
異情節業已叙明臣隨查去年十月二十五日遵義永  
安庄居民王正相家果被強賊劫擄飛報遣將發兵追

捉已無踪影此時遵義止一空城賊原不入桐梓堅守  
亦未來犯按臣吳尚默入境見駐夔府去瞿塘咫尺臣  
曾移會竝未有文飛報大抵苗孽未戢人情易動專以  
鼠狗之竊張爲風鶴之驚荆楚逼近黔蜀聲勢相倚桑  
土衣裯理宜預戒况道將稟報相同地方人心搖惑該  
撫臣畢懋康既有所聞安得不據以上告業經再疏申  
明臣可以無言皇上睠焉西顧戒諭諄諄又於御史王  
祚昌疏內批停議叙成命似若臣蒙蔽掩飾不以上聞  
臣愚不肖何地自容故據實申明前事若此非敢一字

有欺也再照遵義郡城逼近酋穴三陷之後城墻俱被  
挖毀田野盡爲荆榛我兵不入賊亦不來去歲冬間始  
將城垣修復臣檄監軍僉事盧安世率副總兵林兆鼎  
遊擊侯良柱陳一龍等于十一月十六日督兵三萬入  
城屯守水西各賊於十二月初一日突犯板角營已經  
殺敗逃遁至於除夜復統大衆四面攻圍道將率兵出  
城大戰擒斬千餘追奔入巢臣維關爭方始接濟不敷  
未敢侈張其事止據道將塘報揭報到部亦未疏聞昔  
仲尼論兵曰足食足兵民信三者今民旣好亂將且造

訛而有兵無食百窘千難臣庸劣病軀無計可措前事  
雖幸苟安後來實所難料撫臣修理城邑簡練防禦之  
說真綢繆之急策而纓冠之大誼所當勅部亟議舉行  
者也爲此具本謹題請旨天啓五年三月初四日上奉  
聖旨

保留給繇府佐疏畧

題爲保留給繇府佐官員事據四川布政使司呈奉臣  
批據成都府申准本府管糧通判胡希舜牒稱見年三  
十九歲陝西西安府三原縣人繇舉人萬曆四十六年  
四月內除授直隸安慶府通判本年七月初六日到任  
九月初二日丁母憂服闋赴部天啓元年四月內復除  
今職二年二月十七日到任扣該四年十一月十九日  
連前任計閏實歷俸三十六箇月三年任滿例應給繇  
云云該臣會同巡按四川監察御史吳尚默考覈得成

都府通判胡希舜意念精勤才諳熟練握筭曲周民隱  
砥節常畏人知稱職及查府佐給繇例應赴部但今援  
黔理餉收支紀覈地方需人難便離任相應照例保留  
止造冊齎部爲此具本謹題請旨天啓五年三月初四  
日上奉聖旨



簡兵屯守疏

題爲備陳協戰之難亟議固圉之策伏祈明聖治臣不效之罪立賜褫放勅部速議良圖以無悞封疆事臣行能淺劣濫荷重任適黔禍震鄰奉旨協援屢接黔省督臣蔡復一手札移會春初舉事臣因各兵調集一面檄各將本年正月二十六日誓師二月十一日會兵大方一面移咨黔督去後至二十七日遵義監軍僉事盧安世呈報到臣云黔省大兵已檄正月十五日渡河奉黔督令二十七日會兵水西城適該省叅將許成名於二

十日到府隨於二十二日會兵進發等因臣遂飛檄永寧一路鎮道毋泥前期俱於正月三十日點發過河至二月初二日據盧僉事塘報副總林兆鼎率同侯良柱陳一龍等併黔中副將許成名會兵先發板山營胡斯化等攻破樂蒙沙溪巖孔一帶併力前進至二十三日於白蠟坎與賊對敵賊勢猖狂我兵出奇分三路包截將賊殺敗斬級三百六十三顆二十四日至八里水西賊追趕陸廣官兵甚急我兵接抵護出越僉事并滇毛兵七八千等因又據大將李維新道臣謝渭許士奇劉

可訓塘報副將秦衍祚同鄧懋官潘應奎孔全斌等前進赤水一路初五日至層臺有馬兵殺手至海子大路來截各兵奮勇對敵斬功二十顆生擒五名俘獲男女一十五名口器械牛馬不計坐營劉宗良張洪烈郭起柱張令等前進龍場一路行至養馬司賊驟搗鼓渡河張令衝鋒右手重傷一箭追賊大敗其斬級三十餘顆溺水死者無算自是兩路賊俱深避不出捉獲黔省潰兵王佐等始知黔兵已退各將疑沮未敢遽進等因臣當檄各兵撤至赤水衛馬鈴堡兩處屯劄一面差人至

黔省移問進止知該省路苗蠡起未能再進臣思嚴兵待敵已匝一月賊雖遠避必有狡謀該省業已暫停偏師未可深入隨於三月十二日檄道將退還永寧減汰新調且耕且守聊固吾圉獨是仰奉成命經營歲餘不能建尺寸之效以慰皇上西顧之憂纓髮徒懸逍遙貽咎臣之罪於是無可贖矣顧臣碌碌所處實難敢誦言而無諱可乎夫奢崇明父子雖未正藁街之戮然黨羽擒斬財用罄乏獸奔鳥徙仰人鼻息所恨者安酋未受戎索甘爲逋匿耳臣稔知安酋原非勁敵去歲犯黔普

定三戰而三大敗今歲犯遵義亦大敗岑之最驍雄無  
如魯仲賢羅奇前歲犯古蘭一戰而擒斬厥後傾巢犯  
永寧又一戰而宵奔官兵非畏之也祇是一入其界百  
徑千岐旣佯退以誘我又扼險以邀我高山密箐倚木  
皆巢深洞峭崕無處非窟重以陰雨晦蒙罕覩天日雖  
有智勇未免張皇夫人能搏出山之虎而難逐挺險之  
鹿者形不利勢不便也今日用兵全爲三逆卽殺賊數  
千百人而不得元兇何濟於事此一難也兵旣深入夫  
運必不能前採野無獲伏莽難防無論利鈍難知卽戰

而勝黔滇不牽其前賊併力邀截必犯情歸之忌此二  
難也據黔督移約令蜀兵東出遵義西進畢節而黔專  
進陸廣是蜀環賊之三面而黔獨處一又以水西城爲  
信地計黔省至陸廣爲程二日繇陸廣至水西城亦程  
二日蜀自瀘州至永寧爲程四日自永寧至水西城爲  
程九日繇遵義而進無官程可稽然大約須六七日多  
寡遠近之數迥然懸絕此又難之難也夫蜀民之困極  
矣馬已竭而猶求鴻欲集而無所吸髓旣空揭竿欲起  
外則建昌松潘群奔在在跳梁內則屯戍各兵噉然待

哺晷地之餅難啖無惠之法難振如臣庸闇實所不支  
昔馬援平交廣狄青取崑崙皆越二三年而始得賊首  
當時未聞隣酋有如安酋之肆逆亦未聞官兵直窮其  
所匿也今日卽不言戰而言守遵義逼近酋穴酋豈忘  
情永寧赤水原非蜀衛奈地當全蜀之衝群酋咸伺新  
附未馴勢不得不守是蜀且新增二邊稍有疎虞難杜  
竊發臣所爲日夜徬徨寢食靡寧者也顧臣不獨爲蜀  
憂且爲黔憂蜀尚有民而黔已無民蜀尚能耕而黔久  
不耕無民誰則爲兵不耕何繇得食招募土司徒滋騷

擾之害遠候轉運更多劫掠之虞計日而戰數米而炊  
前跋後蹙其苦更倍幸督臣蔡復一按臣傳宗龍皆赤  
膽勁骨四應有餘西南半壁自當廓清但願皇上寬以  
歲月大發糧餉勿玩小醜而急撻伐之功勿惜小費而  
掣任事之肘務令完固根本剪除枝蔓足兵足食一舉  
而殲厥元寇卽蜀局且不勞而結此不兩待之勢也臣  
方草疏據僉事盧安世揭報督臣蔡復一將移鎮遵義  
此扼賊項背最得地宜伏乞勅下戶兵二部速議便宜  
推廣餉額專委任而責成功戰勝固已在廟堂矣臣庸



祿病軀不稱厥職自審甚明不敢逃罪仰望聖明立議  
削黜俾存殘喘高厚洪恩啣戴其有極哉除留兵需餉  
另疏陳乞外爲此具本謹題請旨天啓五年三月十八  
日上奉聖旨

史方伯病休疏

題爲患病危萬懇乞代題休致以保生還事天啓五年  
二月十四日據四川布政使司呈准本司左布政使史  
文煥關稱職一介愚拙行能無足比數兼家有望入老  
母豈復苟延仕進之時舊歲叨轉蜀藩卽具疏請告乃  
當事者輒加避難之責駁不允上不意抵任未及數月  
毫無補稱偶於二月初旬感冒痰症調理罔效迄今頭  
目昏暈右手酸軟每執筆不能成字蓋已頽然一廢人  
矣兼之病中憶念老親焦苦時事神思迷離寢食俱廢

前疾愈加沉重延醫李榮先等診視咸謂地方風濕之氣侵入肌膚非謝事靜攝難望痊可自思職一身浮漚亦何足惜獨是川中多事之秋衰母倚門爲望爲此冒昧陳請萬非得已懇乞本部院憐念苦情別無規避俯准代題休致俾職得生入里門與親一面則母子以後之日皆賴生成之賜也除呈按院外等因繇詳臣批該司才品兼茂幹濟方新適當倥偬之秋兼總錢穀之寄譬諸寒續儉穀尤萬分倚重者卽有微恙不妨一面調攝一面視事何得遽圖卸擔爲也速寢此念其理時艱

勉留去後至四月初四日據署按察司兵巡川西道按察使王世仁詳稱三月二十五日據錦官驛報稱布政司史布政於本日發牌起程回籍本道聞之不勝駭異卽同都司周官前往攀留見本官身體羸瘦染病情真歸志已決無能挽回卽於本日巳時出城訖理合通報再照印務一事關係匪小本道以一人署一堂五道省會根本重地寥寥一官本道必無署藩之理伏乞另委一員受事庶政務不隳等因通詳前來據此卷查先准吏部咨爲循職掌陳末議以仰裨聖治事該吏科給事

中哀國臣題本部覆議以後請告官員在外仍令撫按  
官代奏等因題奉欽依移咨通行遵照外今查本官自  
舊年十月莅任以來一應兵馬糗糧無不經心料理文  
移旁午目不交睫遂致染病不能視事既經離任去志  
難挽除將該司印務批行按察使王世仁暫攝外該臣  
會同巡按四川監察御史吳尚默看得布政司左布政  
使史文煥雅抱霜嚴壁峻弘才斤運刃遊馭歷資深旬  
宣績茂當茲軍旅多事之日正藉拮据劬勩之功乃以  
風土不宜遂染危疾二司面慰懇留見其形體減瘦實

非假託業經離任勢不能留除行令本官沿途調理候  
命外理合具題伏乞勅下吏部再加查議覆請將史文  
煥准令致仕回籍調理員缺速另推補庶本官與地方  
兩無耽悞矣爲此具本謹題請旨天啓五年四月十四

日上奉聖旨

保留給由府佐疏畧

題爲保留給由府佐官員事據四川布政使司呈奉臣  
批據成都府建昌監理通判易文明呈稱卑職見年三  
十四歲湖廣武昌府武昌衛官籍漢陽府漢陽縣人繇  
舉人云云起送到臣該臣會同巡按四川監察御史吳  
尚默考覈得成都府建昌監理通判易文明馭紛意氣  
自恬柔遠精神常到遐荒納款凋伍銜恩稱職及查府  
佐給由例應赴部第今苗獮竊劫靡常正需料理難便  
離任該司乞要保留相應題請除批行本官照例帶俸

管事外止造冊齎部爲此具本謹題請旨天啓五年五月初六日具題奉聖旨吏部知道



糾參貪暴懦弁疏

題爲懦弁貪暴異常據實糾參以安邊境事臣聞設將  
本以防邊用夏欲以變夸乃不意以最懦最奸之夫爲  
極兇極暴之事剝噬已竭脂膏披猖甚於苗獍有如雅  
黎遊擊陳謨之所爲者方謨初入蜀臣以其將種必嫻  
軍旅檄之至永寧百計推阻今日捏呈一塘報云董卜  
造亂明日又捏造一塘報云熟番糾衆出劫托該道代  
爲請留臣始知其懦也亡何則又具一揭云親帶烏銃  
手八十名皆百發百中之技欲額外加給口糧臣以爲

軍前正需此輩急檄調之行催數十次乃解十名至瀘  
及臣親試並無一人認得銃眼者詰其所以則知原未  
帶有銃手因臣檄急不得已已沿途雇募以應臣乃知  
其貪也及去年二月建昌苗獮出劫該道報警本官誼  
在屠齒例當應援該上南道錢僉事移令督兵一千五  
百前赴越雋衛乃安坐兩箇月員餽三千兩屢屢縱兵  
在街市搶奪並不出衛城一步及臣遣材官羅文才帶  
四十五人度小相嶺撫諭諸苗俱出納款道路遂疏本  
官復覩焉冒撫奪之功臣又知其詐也未幾則以土官

馬應乾欲占上七枝地方詳矣又以西番抄劫化林坪  
詳矣及行道查之則知其計馬應乾者因本官先在越  
鶴各茶商恐道路有阻每包出銀四釐呈明該道著落  
土官馬應乾護送本官欲盡追前利入已不允而故妄  
申也其稱西番抄劫化林坪夸者緣舊例有馬草銀五  
十兩本官欲攘爲已有故捏此詳其貪鄙無耻壽張爲  
幻已無人理矣尤可駭者該所見任雲南保山縣教諭  
周師望至瀘叅謁具一呈詞內稱本所守禦孤城四面  
皆番全仗此武勇之技是禦是守自設將領所重者在

新募而舊額輕所進者在白衣而實職衰每遇一官到任所取各有名色曰下程銀曰差操銀曰衙門修整銀曰什物備辦銀曰酒筵折席銀其去也廂擔銀贖禮銀行李輜重俱皆軍負杉板桌椅床帳香衣盡數而行運至邛雅或嘉定交卸慘毒最極以致七姓千有餘丁今流散十不存五多係投崖飲毒撞石而死等因又開一單云發官銀一錢二分取苡一石計每石值銀七錢此猶平價一發銀一錢取炭一千捆沿山撥羅盡二十戶方能辦此足數其上納之時仍貼賠酒食腳步錢七八

錢討保勘完一發鹽十斤買粟一石鹽二包止八十斤  
取粟十石一發鹽一百斤取椒二百斤其椒每斤時價  
值銀七分一遇椒熟之時差役橫行鷄犬爲之一空一  
白取山菌丁木卓面黃蠟蜂蜜山藥菜果等項萬緒千  
頭一置塘報數十名或三五成羣或六七夜聚以捕賊  
爲名入各鄉訪事私遞報單差票到手無論事之大小  
傾家破產賣兒鬻女一白衣出差到堡卽索夫一名每  
夫仍要幫貼銀三五錢等情該臣批據呈危邊之苦與  
夫官兵擾害之狀殆非盡假仰巡上南道移該遊衙門

查明嚴禁緞本官一見此呈卽不勝憤憤糾集所部毛國元沈進忠周時選等徑將周師望綁至法場鳴鑼放銃卽欲開刀通所一二千人皆爲之叩頭哀號乃姑放免仍押至關聖廟中鑿其門牙割其頭髮越三日而始釋之又焚劫其家男婦盡皆逃散夫地方利弊人得明言况呈詞原不直指本官自合查其有無嘉與休息遽爾焦然作亂此一段猛氣何不用以殺賊而顧用之雪憾也叅照得雅黎遊擊陳謨心毒如蝎力軟於羊捏文避兵已甘巾幘之辱假兵請餉全係市井所爲妄

申番土之變而實以爭利構釁匪輕偶因鄉官之呈而公然作亂藐法如戲當諸苗窺伺之秋亟思良將敗常不類如本官者尚可一日容於地方乎理合具題伏乞勅下兵部再加查議如果臣言不謬覆請行巡按御史將陳謨一切賊私行提到官嚴加究問具奏遣下雅黎遊擊員缺另行銓補施行天啓五年七月十八日具題奉聖旨兵部知道

保留給由府佐疏畧

題爲保留給由府佐官員事據四川布政使司呈奉臣  
批據夔州府申准本府推官蔣化龍牒稱廣西桂林府  
全州人繇舉人云云起送到臣該臣會同巡按四川監  
察御史吳尚默考覈得夔州府推官蔣化龍朗識珠傾  
萬斛姘修案絕一塵幹濟多能題評不爽稱職及照府  
佐給由例應赴部蜀中多事需人料理軍餉錢糧當及  
時清查本官見奉按臣案委查盤難便離任該司具詳  
保留相應照例題請除批行本官照舊帶俸管事外止



造冊齋部爲此具題請旨天啓五年七月十八日具題  
奉聖旨吏部知道

縣令給由疏畧

題爲遵例考覈給由官員事據四川布政使司呈奉臣  
批據閬中縣申准本縣知縣周維光關稱湖廣黃州府  
麻城縣人繇舉人云云起送到臣該臣會同巡按四川  
監察御史吳尚默考覈得閬中縣知縣周維光品格端  
凝才猷練達潔已香焚五夜恤民雨潤千村本官職業  
俱修考居稱職准給由除批令帶俸管事外止造冊齎  
部爲此具題請旨天啓五年七月十八日具題奉聖旨  
吏部知道

留起運錢糧疏

題爲蜀方用兵糧餉甚詘乞賜允留起運錢糧以固危疆事切照遵義與水西貼鄰永寧當四岔交衝落紅土城又係水蔭合縫險地必須戒嚴將士以守爲戰聊固吾圉聽候大舉除今歲三月內援黔新兵暫令歸農外仍留舊兵五萬把守永寧落紅遵桐三處就近分屯相機迎敵所資精餉一日難缺天啓四年蒙皇上允留銀二十六萬五千二百餘兩新舊援兵俱已用盡業經列數開銷訖今年官兵月餉及運米船工腳價等項總筭

該銀六十三萬有奇蜀中甫出湯火連年供億民力已竭實難措辦臣雖奉有新命新撫臣尹同臯尚未履任前項兵餉係三軍命脈不亟議接濟何以使之扞禦查得四川布政司起運錢糧如黃白蠟厨料等項前歲奉有明旨不敢議留外及查歲該加派遼餉銀一十二萬一千三百四十四兩九錢協濟陝西銀十萬四百三十五兩二錢協濟湖廣銀三千五百五十八兩四錢四司料價銀一萬九千四百五十五兩二錢六分藥材銀一千八百四錢四分二厘銅錫銀五千七百五十一兩九

分南京麀皮料價銀一萬一千一兩昌平州銀三百五十七兩五錢富戶銀六十四兩抽兵銀二萬五千兩潞府鹽價銀二千二百九十一兩九錢五分四厘以上共該銀二十九萬二百六十七兩七錢四分六厘又戶部冊開屯糧二萬三千五百四十七兩一錢六分平糶倉穀銀九千五十六兩四錢九分房屋稅契銀一萬兩優免銀五千兩共該四萬七千六百三兩六錢五分部咨內云天啓四年以後留充兵餉以上通共三十三萬七千八百七十一兩三錢九分六厘邇來蜀中藩司官更

事代往往徵解不前卽奉俯允未必實數數年以來全藉帑金楚兌互爲湊濟今則止有本省起運一項此外尚缺額二十九萬二千一百餘兩况目下大張撻伐又復添兵費更不貲應候新撫臣至日另議設處臣謹會同巡按四川監察御史吳尚默合詞上請乞皇上憫念三川赤子連歲轉輸兩地留兵枕戈卧瘳俯將天啓五年分起運各款錢糧勅下戶兵二部酌議上請盡數留充軍前接濟庶戰守有資疆圉可固矣天啓五年七月二十四日具題奉聖旨戶兵二部酌議具覆

捐俸助工疏

奏爲敬捐微俸仰助大工事項接邸報伏見宸居創建  
工作肇興苞茂踵美於累朝崑煥快瞻於萬國佳祥濟  
發皇極攸芋卽庶民無不子來況臣子敢不效力臣久  
處遐陬適逢盛舉歷年俸銀尚未支領謹自天啓三年  
起至天啓五年止歷過三年俸銀九百兩行令四川布  
政司扣貯解進外雖土壤一撮寔無裨於崇高而葵藿  
微忱亦少伸於萬一伏乞勅下工部查收施行天啓五  
年八月二十六日上奉聖旨捐俸助建具見急公該部

知道



就近陞調急缺道臣疏

題爲急缺方面道臣酌議就近陞調以勦軍旅事天啓  
五年八月二十二日據四川重慶府署印推官李必達  
申稱兵巡上川東道副使余新民偶染風痰用藥不效  
於本月二十一日病故等因到臣爲照副使余新民清  
白褻躬忠勤任事瘡痍旣爲改色士庶罔不傾心臣已  
疏令本官監紀一路籌兵理餉朝夕靡遑事冗勞積一  
病不起渝城中小小男女無不悲號罷市者查本官自  
解圍復渝取復遵永種種功績載在敘冊容照例會議

另疏優卹以光泉壤外但該道係遵義咽喉內應遵桐  
軍火器具兵馬錢糧外督二十州縣募運水陸挽輸卽  
臣一入綦遵該道又應督軍深入直搗鬼方委任宜急  
不可一日缺官川東三道祇守東道叅政莊毓慶一人  
在事本官方有督餉調兵之役難兼數局查得安綸兵  
備道見任副使謝渭輝精葢事矢志吞酋譚兵洞燭機  
宜馭下獨持紀律向令監紀永蘭料敵無差治兵有法  
蓋深得寬猛之宜而大爲存漢所懾服者相應卽以本  
官調補兵巡上川東道員缺不但轉移間便可任事卽

徵發調募勦佐助實有賴焉臣謹會同提督軍務巡撫四川等處地方都察院右僉都御史尹同臯巡按四川監察御史吳尚默合詞上請伏乞勅下吏部覆議上請如果臣言不謬將謝渭查照俸格加陞四川布政司叅政兼僉事管理兵巡上川東道事務或仍以原官改調監督料理遺下安綿兵備道員缺另行銓補庶殘黎獲甦而戎務有裨矣天啓五年八月二十六日上奉聖旨吏部知道

議改賢能官員疏

題爲議改賢能官員以資安攘事據兵巡遵義道呈稱  
遵義府同知冉崧於本年八月初六日病故等因到臣  
據此爲照遵義府城三經殘燬幾成旣脫臣檄府縣各  
官隨同道將修補城垣招民耕墾賊屢屢出犯且戰且  
守料理經營稍有頭緒今新推知府李應龍履任未期  
通判尙未除補推官陳達道奉委查盤往來不定該府  
印務缺人料理臣指日移鎮凡督餉查兵諸務一時叢  
集勢難缺官查得達州知州黃立言才周千應守絕一

塵理州最有聲名督餉更饒經濟閣邸報本年六月內  
本官推陞雲南楚雄府同知其地無瘴癘無兵革較之  
遵義尤人所樂趣但爲地擇官且就近取才計非得已  
合無將本官改留遵義府同知深爲便益又重慶府巴  
縣自知縣戴文箕於天啓四年二月丁艱去後至今未  
補查遵義進兵一向糧米器械等項俱仰給於重慶而  
巴縣爲首邑倚藉更切必大有才望熟習事體者方克  
勝任查得萬縣知縣毛羽健英姿卓識潔守通才衝疲  
事事改觀本漢人人頌德到任以來正黔蜀徵兵紛錯

之會屢屢議調爲士民苦留今徵發已有條理繁劇正  
可改移合無以本官改調巴縣藉其才畧用理糾紛匪  
惟地方之幸實撻伐之資也臣謹會同提督軍務巡撫  
四川等處地方都察院右僉都御史尹同臯巡按四川  
監察御史吳尚默合詞上請伏乞勅下吏部覆議具題  
將達州知州今陞楚雄府同知黃立言改留遵義府同  
知萬縣知縣毛羽健改調巴縣知縣其楚雄府同知員  
缺另行推補巴縣倘有新選知縣卽改萬縣知縣員缺  
實爲兩便天啓五年八月二十六日上奉聖旨吏部知

道

酌議陞調縣令咨

爲囂殘懸缺日久酌議陞調以安要地事爲照雲陽縣知縣李一星於去年九月內被惡生王正祥等趕逐隨經本部院會同巡按吳御史會疏具題見行究問明白而本官中氣染病徑自回籍去訖今照該縣楚蜀通衢士民兩逐縣官囂凌難馭事廢糧逋缺經一年道府屢屢申請就近調任查得巴州南江縣知縣俞相廷器宇黃琮白璧才鋒紫電青霜不吐不茹能節能愛在邑政有餘暇似堪投以囂衝相應卽用本官改調雲陽庶幾



振刷有裨又查得敘州府興文縣自殘破以來向缺正  
官雖經縉紳刊有王自修名色其實裹足不至及查該  
縣原係彈丸民皆土苗在太平時尚不當大縣一小村  
落今遭水火塗炭之餘絕無室廬井牧之聚若非簡一  
實心任事不辭清苦之官招徠整頓不惟縣治鞠爲茂  
草而諸苗衝要之區誰爲保障亦甚可爲地方慮也查  
得宜賓縣儒學訓導委署該縣印務饒廸撫苗得體率  
僕躬耕綽有經濟之才絕無溫飽之念屢經薦舉例授  
民社合無卽以本官陞補興文知縣俾令加意安輯倘

有成效卽會題破格議陞庶殘邊小邑獲資保艾矣再  
照除調縣令係貴部職掌近准咨文覆奉明旨才品異  
等者不時咨部以需急擢等因二官陞改二缺定非所  
願但盤根錯節用別利器爲地借材計非得已理合移  
咨爲此合咨本部煩請查照將南江縣知縣俞相廷改  
調雲陽縣填補回籍知縣李一星員缺宜賓縣訓導饒  
廸陞興文縣知縣填補王自修員缺俱俟具題允日行  
令二官各遵照赴任遺下南江縣知縣宜賓縣儒學訓  
導員缺及未任知縣王自修另行銓補施行天啓五年

八月二十六日咨吏部

薦舉湖陝方面疏

題爲薦舉督屬方面官員事臣奉命撫蜀兼督湖廣荆岳鄖襄四府陝西漢中一府三年於茲矣雖地方遼遠而各監司拮据糧餉其效勛其勞有不容泯者今茲改任例得薦揚除歷任尚淺不槩敘外訪得湖廣布政司左布政使李春茂緯武經文大抱纓冠被髮真心品重巖廊望崇節鉞右布政使翟師雍清修浸玉冰壺亮節擎天石柱才誠兩合聲實俱優屯田水利道按察使吳光義經濟一腔皆赤規爲三尺無私大法小廉刑清

政簡分守下荆南道右叅政劉廣生英標翠栢叅天偉  
抱神駒躍海澄清獨負鎖鑰攸資清軍驛傳道右叅議  
兼僉事張元芳心事天青日皎才謂雷厲風行氣肅軍  
屯膏流民部分巡上荆南道僉事喬拱璧素節玄蟬吸  
露靈心赤水含珠廢墜聿修金湯增重陝西布政司右  
布政使俞誨抱負作霖作礪經綸允武允文瑞石補天  
慈航濟世分守關南道按察使兼叅議張國瑞蘊藉金  
輝玉瑩才華雲湧川流績著漢南名高斗北分巡關南  
道右叅政兼僉事吳養源剛羅數萬甲兵才挺千尋梧

積句宣績茂筦鑰聲宏督糧道副使兼叅議陳陞動念  
憂民饑溺勵精靖世妖氛識度超羣丰猷蓋世提學道  
副使陳應元博雅包羅象緯清貞凜冽冰霜色紫秦關  
芒高井絡以上諸臣俱方面之良急宜不次優擢弘濟  
時艱諒諸臣不負明時而臣亦可不負所舉也伏乞勅  
下吏部再加查訪如果臣言不謬將李春茂等從優擢  
用庶激勸明而監司知勵矣天啓五年九月初二日上  
奉聖旨吏部知道

薦舉四川方面疏

題爲薦舉方面官員事臣奉命撫蜀近已得代方面官員例應薦舉除四川布政司右布政使周維京分守川西道副使鄭國昌遵義道副使廉第分守川東道副使莊毓慶分守下川南道副使王養俊才品素懋整飭方新歷任尚淺遵例不敢槩叙外訪得按察司按察使陳龍光簡淡屹樹丰標精練一清蠹弊棘林無枉憲度維貞分巡川西道管理錢法按察使王世仁應變助勦最久剴繁酬應有餘一片真心九還粹品分巡川北道叅

政蔣仕忠峻節摩雲插漢虛衷執玉捧盈率屬風清除  
奸雷厲安綿道副使謝渭清明月鏡當空勤斂霜蹄馳  
坂術精擒縱績懋保釐兵巡下川南道副使許士奇精  
神劍耀千尋經濟珠傾萬斛匡時大器應變偉才建昌  
道副使張法孔剔釐俗穢都捐振刷威靈旁暢豺無當  
道夜每焚香監軍道副使張起鶚生從九死得完氣雖  
萬人必往險存洞矚籌筭最精叙瀘道副使劉澤大治  
郡克濟艱難蒐乘聿新壁壘政無不舉人莫敢欺威茂  
道監軍叅議劉可訓五載備嘗勞瘁百戰俱悉機宜保



障攸資才名茂著監軍道僉事盧安世立志誓掃狼群  
挺身獨當虎穴人推儒將績擬銅標監軍道僉事段師  
文赤膽濟以弘猷雄心兼有定力芒常燭斗楫自利川  
以上諸臣皆藩臬之良當茲軍旅倥偬拮据奔馳較之  
內地安閑其勞數十倍所當不次優推以示酬勸內劉  
澤大今任尚淺轉自臣屬例得並薦者也再照有薦應  
有刺維是現任司道強半缺員况當大舉撻伐之際需  
人更亟卽欲苛求而亦有不可得者非敢隱蔽以示恩  
也伏乞勅下吏部再加查訪如果臣言不謬將陳龍光

等從優擢用庶勸典章而群心競奮矣天啓五年九月初二日上奉聖旨吏部知道

舉刺湖陝有司疏

題爲舉刺督屬有司官員事臣奉命撫蜀兼督湖廣荆  
岳鄖襄四府陝西漢中一府所據各府縣正官賢不肖  
之狀據司道開報頗得其槩今茲改任例應舉刺除任  
淺者不開外訪得湖廣荊州府知府郭澆朗識精心通  
才潔守剴剴龍光遙映剔釐兎窟潛消襄陽府推官陳  
甲耀斗文光凝氷器宇品隲朗同懸炬哀矜仁浹覆盆  
岳州府推官馬易從恂恂雅度皎皎貞操三尺凜奉漢  
章九流盡歸秦鏡歸州知州楊奇珍淡以守箴誠能動

物經理衝途得體撫摩瘠土流膏襄陽縣知縣樊一蘅  
品鑒千山秋曙才猷萬斛春濤破柱威伸拔葵節稟江  
陵縣知縣黃昌爽氣絕倫宏才遊刃兩地棠陰蔽芾一  
簾鶴影蕭疎平江縣知縣車夢瑞長才立解糾紛慧識  
潛消城社春烟藹藹秋月溶溶房縣知縣傅永淳倜儻  
才猷嶙峋品格雙佩龍光灼爍九苞鳳采焜煌石首縣  
知縣周士麒操履霜寒絕巘精明月映長空澤盍郊圻  
風清城社宜都縣知縣陸昌祚鎮定政無不舉精明吏  
莫敢欺害馬悉除蜚鴻環集陝西漢中府知府金本高

品同岳峙才若刃遊清風表帥列城石畫綢繆半壁漢  
中府推官王東岱靈襟朗徹偉度端凝程才月旦無私  
讞獄隱微畢照寧羗州知州陳明廷兢業臨淵集木撫  
摩起瘠噓枯才品並優軍民胥戴興安州知州張繼孔  
宅心豈弟敷政精詳甘霖夙沛川江麗日偏高秦嶠漢  
陰縣知縣李時禎冲度了無俗韻英猷盡合時宜六案  
無塵于村雷潤鳳縣知縣楊茂齡才華星燦操履冰寒  
邑當子午之衝民頌日星之照以上諸臣皆一時有司  
之良所當薦揚以備擢用行取之選者也又訪得荊州

府石首縣知縣今陞山西霍州知州洪文淵荒淫無度  
檢押全疎徵輸絕不經心幾務盡行沉閣查據單款一  
守道批發罪穀二千石召夫通縣二十一里共排年二  
百一十名每名該穀九石止給六石各排各賠穀三石  
召夫共穀六百三十石有奇易價入已周鉞證一通縣  
二十一里除優免外共堤夫一千七百名每名九十日  
止入百名用工後九百名每名追工價一兩共追銀九  
百兩書手王應建證一大木往縣經過通縣二十一里  
共起派夫八百四十名每名徵銀二錢八分共銀二百

三十兩有零後木簾過縣止用外起派逐門人夫銀扣  
入已追冊證一徵收南糧原額外止加耗米二斗今改  
額外三十五升又淋尖交耳順風多徵米一千石有奇  
折價扣用一徵收潞稞原額每一兩外加二錢五分爲  
費用係庄總自收交兌差官本官自收每兩勒加五錢  
共多收銀三百餘兩庫吏劉潤證一誣捉永州王客人  
爲盜本官親自封船將貨物入庫苦刑考打成招解府  
審無真贓失主行文永州查原籍保結釋放客人至縣  
具領原船貨物又責二十板止發空船貨物不給卷案

可查一奉文革退民壯李尚錫等四十二名每名上銀  
二兩者准與復役不一月全收兵書證一徵收條編錢  
糧私置法馬每兩外加火耗銀一錢有零扣貯入已庫  
吏羅銘證一莅任一月卽差書手胡自忠娶荊州府原  
相交娼婦爲妾以致妻妾不和嚷至公堂周諫證一縱  
子從師周秀才爲名每每在外飲酒宿娼一本官荒於  
酒色不理糧餉以致任內錢糧逋欠最多貽累後官帶  
徵罰俸至今無能清楚欠冊證此一臣者心地不端操  
持已壞在任猶能塗飾去後嘖有煩言所當照不謹劄



革職閑住者也伏乞勅下吏部再加查訪如果臣言不  
謬將郭澆等循資擢用洪文淵革職閑住庶勸懲彰而  
羣工爭奮矣天啓五年九月初二日上奉聖旨吏部知  
道

舉劾四川有司疏

題爲舉劾有司官員事臣奉命撫蜀今已得代所有合屬守令官員賢不肖之尤者悉心體訪聞見頗真復據司道開報相同例應舉劾除俸未及期不敢開敘外訪得成都府知府李一公禔躬凜凜德讓應務炳炳丰猷重地金湯專城領袖夔州府知府史贊舜峻品楷模獨肅長才批導咸宜闡境膏霖救時福曜龍安府知府伍元正朗識肩弘任鉅清修茹蘗飲水溝瘠頓駐邊防攸賴保寧府知府王橋法嚴城社肅清惠溥間閭霑溉列

城象指險閣增雄重慶府同知張堯揆千尋勁氣一片  
寒氷治邑民頌來蘇理餉軍皆宿飽烏撒府同知吳伯  
錡清貞自好倜儻不羣仕蜀久著芳聲委任極多勞績  
順慶府同知耿進明心思兢惕規畫安詳詰戎弊絕竄  
釐署篆政平訟理成都府通判胡希舜精明器宇練達  
才華奉公一念無欺應務百爲輒辦順慶府通判連鎔  
英爽有爲勤勞匪懈歷署法清逋隱緝奸計靖萑苻保  
寧府推官錢允鯨品韻朱弦清越才猷寶鏘光芒法署  
陽春人倫氷鑑成都府推官李曰輔朗識洞於觀火長

材捷若運斤平反無冤品題悉當重慶府推官李必達  
識度淵深才情焜耀閱歷偏多善譽持循綽有芳模順  
慶府推官辛嗣進清標絕俗丹筆流膏安安恪守章程  
朗朗虛懸衡鑑敘州府推官詹先志胸羅萬象目鮮全  
牛治獄電掃長空署篆風清積案遵義府推官陳達道  
志切吞夸勞先入險經綸動中窾繁操持可質神明劍  
州知州鄭之良砥礪絕無點染剔釐雅有擔當近悅遠  
來民怡吏悚運同管真安州事楊汝昇遇亂共誇墨守  
裋躬獨凜素絲勞績久彰循聲最懋茂州知州岑昌運

淡約自甘寒素謹凜若履淵冰夸漢輯安軍民歌咏萬  
縣知縣毛羽健峻挺雪山萬仞明同月鏡一輪四野膏  
淪百城望最南充縣知縣羅宰實政民安士服清修蘗  
苦冰寒衾影不慙聲名懋著華陽縣知縣文士昂英姿  
神駿騰空粹履寒潭徹底名高赤社品重清華閭中縣  
知縣周維光五紵雅操百鍊長才整頓無弊不釐撫字  
有天皆雨西充縣知縣程士升昂昂勁骨朗朗精心琴  
堂與水同清鐵案如山莫撼南溪縣知縣王之朝才誠  
並運心力俱勞萬家哀羽傾心一片劫灰起色富順縣

知縣林元春陽在握秋水爲神慈祥衆樂安恬敦大事  
咸修舉新繁縣知縣趙光宗砥躬節儉馭下端嚴一簾  
琴韻悠悠四野谷風習習南江縣知縣俞相廷映玉清  
心斲輪妙手惻隱一腔懇款陽和萬井氤氲奉節縣知  
縣萬同泰品格嶙峋才情絢爛剔蠹秋風掃籜愛民春  
雨生花長壽縣知縣徐爾一擔當定力康濟弘猷革奸  
弊絕憑城起瘠膏流比屋安岳縣知縣趙民戴勁氣遇  
難彌堅良畫應機立辦積勞積苦實政實心仁壽縣知  
縣王用汲摘奸不畏疆禦沛澤丕振顛連野起謳聲案

清滯牘雙流縣知縣楊世綬心若持盈捧璧政惟守法  
奉公鸞鳳歌騰羔羊節漂隣水縣知縣龔之彥運刀立  
解輓憚調瑟一清囂競絕無粉飾綽有擔當峩眉縣知  
縣王加相清貞集事豈弟宜民村中蔚有繁桑境內恬  
無哀鴈東鄉縣知縣龍德正識度遠超塵外精神盡入  
事中駕促戴星門如止水遵義府同知管仁懷縣事商  
良弼久歷險巇力披榛莽惠政交行夸漢至誠可格豚  
魚遵義縣知縣丘可恒身可探驪將虎勞真濡首焦毛  
流散懷歸瘡痍頓起桐梓縣知縣陳揚美葺荒城於再

造馭新附以知方綠野回春青萍吐氣納谿縣知縣吳  
尚文力振無居殘邑懋宣轉運英猷心計獨精血誠堪  
倚江安縣知縣陳龍光矢衷真實不欺遇事調劑有法  
汙萊悉墾廢墜聿修榮昌縣知縣李雲衢英茂偏饒幹  
濟矯健不事媿阿律已惟嚴與民無擾合江縣知縣劉  
應辰愛民直欲寘懷守節真同捧璧政成清淨民戴慈  
祥成都縣知縣翟元懿沉恂雅度朴茂醇衷御輿聲色  
自如理劇科條不紊通江縣知縣易尚杰器重不浮識  
精善斷批導發硲利刃清瑩出水新葉梓潼縣知縣馬



彥賢精心能翕能張雅量不茹不吐人懷樂易政奏廉  
平新津縣知縣管一鯨蒿日民暑殫精餉務節愛春回  
巖谷嚴明霜肅庭階岳池縣知縣高梁楹才識疏通丰  
神續密峻法不撓巨猾肫仁徧布窮畧以上諸臣皆有  
司之良所當薦揚以備擢用行取者也又訪得保縣知  
縣朱拱宸心神躁妄舉動乖張喜事每拂人情信奸殊  
玷官守一本官於天啓四年正月內將布政司發下番  
銀七百兩貯庫不放以致鼓譟後差徐之龍解銀二千  
兩往彼方取出前銀給與衆番始得安撫徐之龍證一

本官差阜隸趙拱佑張大經私印硃串票六張前往崇寧縣乾銷各軍兵三年分餉米五百石得受銀六十兩楊奇受張典周松安等證一本官將達思蠻長官司欽賞銀五百二十五兩假以查數放散取本司印領先勒銀四十兩張大受趙禎龍證一本官假查點兵番嚇索河西食糧番兵本卜太等磕頭紙價銀六十兩花貨四件袁文王粹修證一本官聽信徐登階聳稟假以犒賞寨首本卜太頭巾一頂勒索銀碗一個重三兩麝香二斤張大猷王朝用證一本官奉藩司解邊糧銀三千二

百兩到縣於查盤冊內冒造使費開銷一百八十餘兩  
徐應臣王禮健等證一本官將年例坐編溫江郫縣祭  
銀共三十兩侵吞二載不行祭祀唐教官等證此一臣  
者恃才妄作縱役作奸夸漢咸起怨咨操持亦且敗壞  
所當照不謹例革職閑住者也潼川州鹽亭縣知縣區  
縉律已不端馭民無法在邑已多穢狀署篆更有煩言  
一本官徵收大糧條銀重取火耗每銀一兩外加一錢  
折封之時先取幾錠入拜廂內方纔秤兌正數短少不  
管責令收頭賠補黃光等證一庫吏趙棟收過稅契銀

一百二十兩本官拆封遂取六十兩入已仍說所收契銀不止此數夾打賠補趙棟證一本縣驛馬四十八匹縣馬四十二匹每匹工食銀二十四兩本官聽信積惡杜鳳鳴聳稟每工食銀一百兩內扣除十兩任從鳳鳴包當馬戶躲閃差役仍報鄉民王金曉等每家買馬六匹替走累死一半王金曉證一本官每遇投文濫准詞狀審時擬罪不論事情大小曲直原告被告槩罰三兩六錢干證亦問紙銀二錢劉仕元等證一本官終日嗜酒票取酒戶上好高酒不計其數及酒戶領價反說酒

不堪用應該打死價銀分釐不與行戶李忠證一本官署潼川州印務支放皇華五城古店建寧秋林等驛夫馬工食每驛扣銀四十兩入已又作成衙役需索常規遲延不發五城驛驛丞出有揭帖皇華驛李驛丞詳申證此一臣者事既糊塗守復縱肆不惟無德於百姓甚且被訐於驛官併當照不謹例革職閑住者也夔州府新寧縣知縣高文偉百般疎縱一味糊塗線索全被人牽威福專憑狐假一本官到任隨帶妻姪陳純王文看稿錢糧磨美俱經其手純住後堂左邊書房被門子戴

應麟將繼母朱氏年二十五歲張之桂妻年一十九歲  
逐夜暗送書房色買陳純倚勢害人後秦可啓因營管  
錢糧未得將陳純并羅在泗具告本道已結本官方纔  
知覺將陳純押送回籍通縣共知戴啓志等證一本官  
訪拿豪蠹劉階等而機事預洩於人致刁民造反噬之  
謀事事掣肘意氣墮頽一本官堂規不肅每日升堂左  
右擁擠全憑吏曹寅書手陳以玉朱應運黃有道王德  
政差頭楊光現隊長戴友志快手周永仁等左右調度  
言出卽行本官全無主持通縣合堂人役證一本官御

下不嚴前按院考察該縣吏書獄囚無一至者本官徒  
付之浩嘆而事後亦不創懲致吏書全無畏憚縣中諸  
事俱廢一本府行各屬裁革民快各役本官聽信兵房  
囑稟以事多差繁仍令每名幫合一名致多白役下鄉  
擾害差頭楊光現證此一臣者昏瞶敗箴闕茸廢事僻  
地尚然委轡前路再難更張所當照罷軟例責令致仕  
者也成都府建昌監理通判易文明賦性優柔當機躑  
躑職守頗多疎曠吝情全欠調停一本官到任卽與劣  
處寧越通判張爾恕彼此爭訐幾動干戈卷案證一差

阜快王光宇等前去會川衛縛拿犯人激變一衛將差人綁殺一齊上山該道張按察使撫諭始各回衛卷證一妄調刺兵致與水托苗人相通兵將失事本官寔司監紀其責難辭一天啓四年一聞苗賊蠢動卽將家眷乘便送出成都今年正月道將正缺節檄本官料理乃假以考滿徑離信地耽延半年不復回衛此一臣者操持雖未敗壞緩急全不擔當視法紀爲弁髦以官守爲兒戲所當照不及例重加降調者也伏乞勅下吏部再加查訪如果臣言不謬將李一公等循資擢用行取朱



拱辰等分別議處庶彰輝肅而人心奮其於吏治民生  
未必無小補矣天啓五年九月初二日上奉聖旨吏部  
知道

薦舉佐領疏

題爲薦舉佐領官員事臣奉命撫蜀今已得代所有佐領官員例應薦舉訪得簡州同知楊世功清嚴不染常例勤慎綽有幹才巴州同知周德兆器宇恬然無競才華卓爾不羣嘉定州判官馮應龍委署能清逋隱裊躬綽有操持保寧府經歷鍾萬璋粹履恪持寒素虛衷如履淵冰重慶衛經歷譚至言奉委勤勞匪懈署邑幹濟多能安岳縣主簿沈貞甫恬雅全無俗味精勤能恤民若以上各官皆一時佐領之良所當薦揚以備錄用者

也伏乞勅下吏部再加查訪如果臣言不謬將楊世功等酌量錄用庶簡拔不遺末品而庶職爭相感奮矣天啓五年九月初二日題奉聖旨吏部知道

薦舉王官疏

題爲薦舉藩府輔導官員事案照先准吏部咨稱今後長史等官果輔導有方操履無疵者照例保薦不妨破格優處通行遵照外臣奉命撫蜀今已得代訪得蜀府長史司右長史母習吉謙冲丰度縝密才情守城夙著勤勞輔導雅多啓沃審理所審理程文弼裊躬克稱嫗修治邑素饒善政淹棲共惜聲實彌騰此二臣者質行醇衷曳裾僅見所當薦揚以備優處者也伏乞勅下吏部再加查訪如果臣言不謬將母習吉等照例甄錄庶

閒局不至墮心而長才咸思驟首矣天啓五年九月初  
二日題奉聖旨吏部知道

薦舉教職疏

題爲薦舉教職官員事臣奉命撫蜀今已得代所有教職官員例應薦舉訪得雅州學正朱汝楫博雅直窮藝圃端嚴丕振師模西充縣教諭母忠珠斗常飛劒氣銀釭時伴書聲蓬州學正李仕顯問奇戶履常滿守澹門雀可羅興文縣教諭冷之澤亂後一瓊未穩筆端五色頻抽萬縣教諭高似斗姱修遠步先民端範弘開後學什邡縣訓導李廷梁下捷以文自樂擁臯惟道相摩內江縣訓導王宸極青年攻苦圖書雅志能安恬澹通江

縣訓導魏漢毓博與古人爲友慎同處女守閨宜賓縣  
訓導饒迪應變經綸有法裊躬堅白無瑕遂寧縣訓導  
萬縉急難獨能捐俸色笑不肯徇人簡州訓導王從誨  
才華卓爾不凡器宇溫然可掬榮經縣訓導邊上儒譚  
道疊疊名理却贊凜凜清規江津縣訓導張應徵粹養  
足誇武庫清心常映冰壺雲陽縣訓導文可聘雄文樹  
幟雞壇潔履蜚聲虎帳崇慶州訓導趙文星恬雅能立  
師模通達兼長吏事重慶府訓導楊希穆英爽全無俗  
味清貞可樹遠猷以上諸臣皆一時教職之良所當薦

揚以備六館有司之選者也伏乞勅下吏部查果臣言  
不謬將朱汝楫等分別擢用庶儒官知奮而教化蒸蒸  
起矣天啓五年九月初二日題奉聖旨吏部知道



薦舉人材疏

題爲薦舉地方人材事蜀山川奇秀夙產瑋材臣自任  
事適遭兵火所藉境內諸賢竭力振救或製器應敵或  
匍匐叩關或重繭請援或集兵起義或垂橐助餉無非  
氣激家憂計紓國難當紛紜倥偬之時顯拮据勛勩之  
節蓋天寔生之以供皇上之驅使者連城之壁以剖見  
良困衡始作何可終弃除已受徵書趣裝在邇與新承  
俞旨方賦遂初者不敢槩敘外訪得原任兵部侍郎楊  
述中允武允文大畧作霖作楫英猷瑣闥輸忠於補袞

天日長懸牙璋定計於攻心安攘攸賴未堪邁軸共擬  
鹽梅原任大理寺少卿宋興祖直節端操夙擅扶綱飭  
紀潛修粹養洵能立懦廉頑芝蘭在僻而彌香薑桂以  
老而愈辣原任大理寺右寺丞梁之棟千仞振衣高躅  
一爐告夜丹心攬轡澄清豺狼莫敢當道杜門卻掃猿  
鶴詎足親人應挽遁思用肩弘鉅原任應天府府尹鄭  
璧博雅宏襟沉潛邃養歷任規天條地雅負折衝歸來  
閉戶著書未忘經濟衡棲其惜環名宜膺原任湖廣道  
御史張似渠居常習靜辭器遇難揮戈起義七尺昂藏

勁骨歷磨折而彌堅滿腔慷慨亮猷真安危之可倚原  
任湖廣道御史陞福建副使未任卒志夔觸邪秉凜凜  
正氣南牀諫草猶新捍難奏炳炳膚功西土鄉評最懋  
時清已著公道名高未許閒居原任雲南道御史李良  
棟動念憂時匡世褻躬執玉捧盈獨立敢言夙著芳聲  
於寒謬齋居樂道宜揆潛德於隱淪原任戶部陝西司  
郎中喻思恪居閒雅多著述抵掌盡是孫吳壯志未衰  
尚與借等黃石清芬可挹未應終老衡門原任湖廣左  
布政使劉之龍堅白貞姿典型重望敷歷大藩績與漢

江俱永掛冠神武心隨巴水同清雖則息機宜膺大擢  
原任陝西左布政使熊應占金莖爽潔玉尺端方膏雨  
芄苗久貽分陝之澤清風草榻偏高冲斗之芒輿徹粉  
榆望隆節鉞原任湖廣叅政卞承憲守節端凝棲衷澹  
泊爲母陳情夙著舞綵之譽縋城濱死益高板蕩之貞  
物望允孚沉淪宜起原任井陘道叅政朱之臣嶙峋氣  
節端介丰猷環堵以居長謝江干車馬擇地而蹈望凝  
秋水芙蓉宜賁前旌以收大器原任河南副使張與可  
品融鶴唳秋空養邃蛟潛滄海身不隨時俯仰遠邇快

矩度堪摹心雖與世渾忘中外想經綸再布原任陝西  
叅議黃煒峻節獨堅直道無枉叩之若黃鐘大呂聲韻  
殊常就之則高山深林蘊含彌富丘壑雖饒勝致廟廊  
宜拔幽人原任雲南府推官楊國瓚助餉不辭番橐赴  
義甘冒重圍年力正青勤勞宜錄以上皆蜀材也出處  
各有不同而德望才名著於梓里皆可以蜚揚天路弘  
濟時艱自遭禍亂無不殫厥心力如張似渠牟志夔傾  
家起義卒收捍禦之功楊國瓚以小臣而奮志從戎不  
辭傾橐此尤臣所與同事患難者不敢不表而出之伏

乞勅下吏部再加查議如果臣言不謬將楊述中等及時起用庶安攘不患乏材其禪於宗社生靈匪淺眇矣  
天啓五年九月初二日上奉聖旨吏部知道

舉劾武職疏

題爲舉劾武職官員事臣叨奉新命業已得代而方議  
撻伐大局未終凡一切軍前効用官自大將李維新副  
將林兆鼎以下業已具疏求爲晉秩與令建監卽有未  
入疏者期收蕩平之效方議激勸之典俱不敢概叙外  
惟是分扼各鎮與夫衛所等官不在軍前例當舉刺謹  
具耳目見聞併司道開報其賢不肖之尤者一一爲皇  
上陳之訪得松潘副總兵秦翼明冠玉英標彎弧絕技  
志欲乘風破浪謀周末雨先霜建昌副總兵管操捕事

陳廷對雄心學劍學書偉畧能擒能縱勤勞匪懈保障  
攸資叅將管都司事周官精神警敏才略縱橫譚兵奇  
正迭生握篆寬嚴得體叅將管中軍副總兵事魯美中  
說禮敦詩雅志輕裘緩帶儒風令肅貌貅法嚴刁斗都  
司僉事李必茂七書素習百發無虛傳宣步伐不愆委  
署漢夸歸信松潘南路叅將張承恩器宇昂藏才華曉  
暢擐甲風生八面提鞭令肅三軍叅將管建南遊擊事  
秦拱明請纓年少握槊才雄一時苗猱傾心萬里金湯  
生色鎮遠營坐營守備徐之龍才情俊爽體貌魁梧止



齊令肅貌貅叱咤威行壁壘平番守備許應元氣壯兜  
鍪機立帷幄籌敵功推保障撫軍廉絕繭絲兵巡川西  
道中軍守備王國臣搽縱悉符款會條陳切中機宜志  
惕聞鷄勲期縛虎分巡川北道中軍守備夏才超群武  
畧絕俗貞搽三軍部伍整齊八陣神機曉暢建昌道中  
軍守備魏民望英爽吳鈞出匣精勤越弩圓潮壁壘改  
觀屯營銜德松潘道中軍守備吳盡臣年姿壯茂意氣  
騰驤鳴鞭草木皆兵發號風雲動色寧川衛指揮周斯  
盛壯志夙嫻將畧英風不墜家聲足任折衝欣看奪幟

成都右衛掌印指揮唐蓋賦性真實不欺應務勤勞匪  
懈馭軍無染署篆有聲松潘衛掌印指揮謝起源聞警  
每先擐甲分甘共感投醪計密衣袵才堪禦侮松潘坐  
營納級指揮吳繼業智足籌邊才誇出衆劒氣橫秋颯  
颯弓稍映月森森松潘衛指揮邊一廉丰姿英偉氣槩  
騰驤捍城久著膚功固壘偏饒勝筭松潘衛納級指揮  
徐佳慶馭士分甘共苦運籌戡亂扶傾令肅傳宣威生  
組練重慶衛掌印指揮高凌曜立志皎然不欺應務恢  
乎能辦勤廉並著艱巨堪膺叙南衛指揮顧俊俠骨昂

藏軍機熟練訓士恩聯指臂臨戎氣撼山河建昌衛指  
揮王國揚威儀峻整謀略淵沉撫綏極得夸心整頓克  
遵軍法重慶衛指揮史其昌虎頭出衆豹略蟠胸譚兵  
氣吐長虹起義血腥寶劍重慶衛指揮沈仍燧射可落  
鵬文堪倚馬遇難備遭磨折譚兵綽有謀猷保寧千戶  
所納級指揮王永年沉恂器宇警敏手猷宣威境內霜  
清恤士軍中續煖寧川衛百戶彭祚守職最甘澹泊奉  
委不憚驅馳洞悉險夸堪資捍禦成都中衛百戶李友  
松誠心應事竭力奉公彎弓足嫺穿楊負材未堪伏櫪

以上諸臣俱一時武弁之良所當薦揚以備擢用者也  
又訪得龍安叅將孫宣潦倒無能優柔不振經年抱病  
已無精銳之鋒聞警杜門殊乏捍禦之術白馬番不時  
出搶近堡曾無一矢相遺小河營屢次借兵護糧輒爲  
掩耳不問縱字識周文私冒軍丁二十名全無覺察任  
奸軍王二明發餉銀二百兩一味包含此一臣者操持  
未壞而意氣頗頽危邊多事之地殊難卧理所當革任  
回衛者也伏乞勅下兵部再加查訪如果臣言不謬將  
秦翼明等分別擢用孫宣革任回衛庶勸懲肅而疆圉

亦可飭矣天啓五年九月初二日題奉聖旨兵部知道

先曾祖少師公在明季以名進士歷官蜀藩值永寧宣撫使奢崇明父子變作殺蜀撫徐公可求於重慶遂犯成都先曾祖厲衆城守百有二日始解圍發兵追賊復州縣之陷賊者朝命卽以先曾祖撫蜀剿奢酋旋晉兵部左侍郎兼右都御史總督川湖等處軍務蘭州平晉兵部尙書加少保予世廕錦衣指揮使而以外艱歸時水西土同知安邦彥亦反黔中殺黔撫王公三善在事督撫諸公俱待勘賊勢猖甚乃卽家起拜先曾祖總督貴州五省軍務勦水西不逾年斬元兇安邦彥平水西

割水外地千有餘里建三十六城立衛所以守之晉少  
師復予世廕先後在師中十七年屢請告不允卒于官  
年七十有三其功具載明史向者先曾祖自著有蜀事  
紀畧一編及督蜀督黔疏草數百道其經營規畫決勝  
機宜皆于是乎寓當時俱已鏤板而寒家遭罹兵燹故  
籍無一存者幸從弟世衛從外氏劉念臺先生家得全  
帙歸弄爲世寶然止一本恐流傳不廣康熙丙申

人龍

脩官淮上寓書于弟願携所弄各本悉見付重付剞劂  
弟欣然許諾乃先梓蜀事紀畧一編以次及督蜀督黔

疏草各列爲十二卷其原本字有舛落加之傳鈔訛謬  
棘手轉多于是與有識之士商榷校訂數過而後歲厥  
事焉不意雕鐫垂竣而工人不戒於火其板又悉付諸  
灰燼嗟乎豈後人之不肖不足以傳先烈歟抑志之不  
固致事之鮮終也于是再爲鳩工務有以竟吾志亦庶  
幾先人斷簡殘編常留天壤則千古如見其人爾康熙  
五十八年夏四月旣望曾孫人龍百拜識



少師公督蜀督黔疏草先君從十一叔處抄得原本依  
年月次序各列十二卷復校正舛訛以付梓人乃梓將  
竣而其板燬于火先君不忍其事之輟于垂成也復梓  
之以竟厥緒不意開雕甫三卷而先君遽遭不祿嗚呼  
余小子其敢中廢之耶于是悉依原刻部分重加讐校  
越一年梓始竣奈督黔諸疏中頗多脫簡又無別本可  
考不得已而闕之其前後文則自相屬也海內藏書家  
如有先少師遺稿當採而補之庶幾使先君復訂是編  
之意全而勿缺云康熙庚子秋七月元孫

源星

百拜識